

## Agalatia

<sup>1</sup> Unene ni Paulo mutuung'waa. Unene shanga nimutuung'waa kupuma ku ana adamu ang'wi kukiila ku ana adamu, kuiti kukiila kung'wa Yesu Kristo ni Itunda Tata nai umiukilye kupuma kuashi. <sup>2</sup> Palung'wi ni aluna ihi nu nene, kumakilisilya imatekeelo a ku Galatia. <sup>3</sup> Ukende utule kilanyu nu ulyuuku nu upembeeye kung'wa Itunda Tata witu nu Mukulu uYesu Kristo. <sup>4</sup> Nai wipumilye mukola kunsoko a milandu itu iti kina akugune ni matungo aya na ubii. Kupuumila nu ulowa nuang'wa Itunda witu hangi Tata. <sup>5</sup> Kitalakwe itule ikulyo i kali na kali. <sup>6</sup> Ni kenda kuilwa kina mukenda kaya kupilukila mu nkani ninza ingiiza, nienda kuilwa kina mukupilukila kuli kupuma kung'waakwe ng'wensu nai umitangileku ukende nu ang'wa Kristo. <sup>7</sup> Kutili nkani ninza ni ingiiza, kuiti akoli antu ang'wi ni akumusasha unyenye ulwago nu kulowa kukaila nkani ninza ni ang'wa Kristo. <sup>8</sup> Kuite ga anga ize usese ang'wi amalaika kupuma kilunde wikatanantya kitalanyu nkani ninza isa nu ulu nai kutanantilye kitalanyu, nu a zung'we. <sup>9</sup> Anga nai kaligitya un'gwandyo, ni itungili kuligitya hangi, "Anga ize ukoli muntu nuikatanantya kitalanyu inkani ninza isa nizi naza muisingilye, nu azung'we". <sup>10</sup> Ku uu itungili kuuduma ukamikiilyi nu a antu ang'wi Itunda? Anga ize nongolekile kugema kualoeelya ana adamu unene shanga ni munyamilimo wang'wa Kristo.

11 Muluna, ndoilwe unye mulinge kina nkani ninza naza niitanantilye shanga ipumiie ku ana adamu. 12 Shanga ai ni nusingiye kupuma ku muntu, ang'wi shanga manyisigwe, Badala akwe, ai ituile inge ku ukunukulwa nu ang'wa Yesu Kristo kitalane. 13 Makonda kija migulya u likalo lane nu la kunyuma mu ikumbiko ni la ki Yahudi, iti nai natuilee kulaja ku utaki ilekeelo lang'wi Itunda kukilinkiila uugemeeligwa nu kulilimilya. 14 Ai natulaa nongolekile mi ikumbiko ni la Kiyahudi kukiliila i a luna ane idu Ayahudi. Ai natulaa ni kinyangulu lukulu mu logo nu la aTata ane. 15 Ku ite Itunda ai uloeigwe nu kumbagula unene kupuma mu nda ang'wa ia. Ai unintangile unene kukiila ukende nu akwe. 16 Kumukaminkiilya ng'wana nu akwe mukati ane ili kina numutanantye ung'wensu mukati a antu nia mahi. Hangi shanga ai ndumile anga usigigwa nu a muili ni sakami. 17 Hangi shanga ai nankie kulongola ku Yerusalemu ku awa nai atulaa atung'wa ze ikili une. Badala akwe nikalongola ku Uarabuni ni panyambele kusuka ku Damesiki. 18 Uugwa kukila i miaka itaatu ai nankie kulongola ku Yerusalemu kumiumba umbila u Kefa, ni kikie nu ng'wensu mahiku ikumi na ataano. 19 Kuiti shanga nikhenga i atung'waa ni auya kwaala Yakobo, muluna nu a Mukulu. 20 Goza, ntongeeela ang'wa Itunda, shanga kukongela ku iko ni kukikilisa kitalanyu. 21 Uugwa nikalongola ku mikoa a Shamu ni Kilikia. 22 Shanga ai ntuile manyikile ku miho ku matekeelo a ku Uyahudi ayo nai atulaa mu ng'wa

Kristo. <sup>23</sup> Ku iti ai atulaa akigiilya udu, "Nuanso nai watulaa ukuaja itungili ukutanantya uhuili nai watulaa ukuugazanja". <sup>24</sup> Ai atulaa akumulumbiilya Itunda kunsoko ane.

## 2

<sup>1</sup> Ze akila imyaka ikumi na inne nika longola hangi ku yerusalemu palung'wi nu Barnaba. Nikamuhola ga nu Tito palung'wi nu nene. <sup>2</sup> Ai nongoe ku nsoko Itunda ai wikaminkiyeye kitalane kina ai ntakiwe kulongola. Ai mbikile ntongeela ao nkani ni nza naza nitantilye ku antu a mahi (kuiti ai ntambue ku kimpinyimpinyi ku nai atambulikile kina atongeelia a kusanigwa) ai nitumile izi iti kukomanilya kina ai natulaa shanga mankile, ang'wi ai mankile nankanda. <sup>3</sup> Ku iti ga uTito, nai watulaa palung'wi nu nene, ai watuile mu Yunai, Usingigwe kotalwa kiganda. <sup>4</sup> Ikani ili ai lipumiye ku nsoko a aluna ni a uteele nai azile ku kimpinyimpinyi kudumiila uulyuku na katulaa nu wenso mung'wa Kristo Yesu. Ai akete nsula kuuzipya usese kutula atung'waa ilagiilyo. <sup>5</sup> Shanga ai kipumilye kuakulya ga nu ku saa ing'wi, iti kina nkani ninza ni ya tai isage shanga ize ikailikile kitalanyu. <sup>6</sup> Ku iti awo nai atambue kina ai atulaa shanga ai ahanguie kihi kitalane. Kihi nai atulaa akukituma shanga ai kituile ni ndogoelyo kitalane Itunda shanga ugombile ukuili nu ana adamu. <sup>7</sup> Badala akwe, ai unihengile kina nihuiwe kuitanantya inkani ni nza ku awo naza shanga atawe kiganda. Ai ituile anga uPetro watanantye nkani ninza

nia tai ku nai atawe kiganda. <sup>8</sup> Ku ndogoelyo Itunda nai witumile u milimo mukati ang'wa Petro kunsoko utuungwaa ku awo nai atawe kiganda ai witumile ga umilimo mu kati ane ku antu ni a mahi. <sup>9</sup> Itungo uYakobo, Kefa nu Yohananai akumukile kina ai azengilellekeelo, ai alingile u ukende nai ninkiingwe unene, ai akusingiye mu uhanguili unene, nu Barnaba. Ai itumile izi iti kina kulongole ku antu ni a mahi, hangi iti kina ahume kulongola ku awa ni atawe kiganda. <sup>10</sup> Ai akuloilwe ga nu sese kuakimbuka i aula. Unene ga ai natulaa nkete insula kituma ikani ili. <sup>11</sup> Matungo uKefa nai wakiza ku Antiokia ai numugiiye ikihenga ku nsoko ai watulaa walimangiila. <sup>12</sup> Ze ikili i antu kitunga kupembya kupuma kung'wa Yakobo, u Kefa ai watulaa ukulya ni antu ni a mahi. Ku iti iantu awa nai akiza, ai ulekile nu kuhega kupuma ku antu ni a mahi. Ai watulaa witumbile i antu nai atakile i kidamu. <sup>13</sup> Lulo luulo i Ayahudi auya ai aambinkanile nu udosi uwu palng'wi nu Kefa. Wigeeli nu akwe ai otuile ga nu Barnaba ai uhoilwe nu udosi nu ao. <sup>14</sup> Ku iti nai nihengile kina ai atulaa shanga atyatile nkani ninza ni a tai, ai numutambuie u Kefa ntongeela ao ihi, "Anga ize unyenye inge mi Ayahudi ku iti mikaie ntendo ni a antu a mahi badala a ntendo ni a Yahudi, Ku niki mukuasinja i antu ni amahi kikie anga Ayahudi?". <sup>15</sup> Usese naza ki Ayahudi kia kutugwa hangi shanga "antu a mahi ni anya milandu ". <sup>16</sup> linga kina kutili nui ailigwa i tai ku ntendo ni a ilagiilyo. Badala akwe i ailigwa tai ane ku uhuili mukati ang'wa Yesu Kristo. Ai

kuzile ku uhuili mukate ang'wa Kristo Yesu iti kina kialigwa tai ane ku uhuili mukate ang'wa Kristo hangi shanga ku ntendo ni a malagiilyo. Ku ntendo ni a malagiilyo kutili umuili nu ika aligwa tai ane. <sup>17</sup> Kuiti anga ni kuumuduma Itunda ku kualya itai ane mukati ang'wa Kristo, keenda ihanga akola ga kina anya milandu, itii uKristo ai uzipigwe mutung'waa nu a milandu? shanga iti! <sup>18</sup> Ndogoelyo anga nzenge isumbiilyo ni lane migulya a kuika ilagiilyo, isumbiilyo naza nakondaa kuliheja, kilagiila u mukola kina kubunanga ilagiilyo. <sup>19</sup> Kukiila ilagiilyo ai nkule ki ilagiilyi Kululo ntakiwe kikie kunsoko ang'wa Itunda. <sup>20</sup> Nagigwe palung'wi nu Kristo, shanga nene hangi ni nkie, ila Kristo nuikie mukati ane. Likalo ni nkie mu muili nkie ku uhuili mukate ang'wa ng'wana wang'wa Itunda, nai iza umuloilwe nu kipumya kunsoko ane. <sup>21</sup> Shanga nu uhitile u ukende nu ang'wa Itunda, ndogoelyo anga itai ane ai ikoli kukiila ilagiilyo, Uugwa u Kristo ai uzeetula ukule na nkanda.

### 3

<sup>1</sup> Unye Agalatia ni miagila imahala, iti gwa nyenyu nai umulogile, unyenye naza u Yesu Kristo ai uikilwe kihenga ntongeela a miho anyu. Kina wagigwe? <sup>2</sup> Unene ndoilwe kulinga ikani ling'wi kupuma kitalanyu, Iti gwa ai musingiye Ungg'wau ng'welu ku ntendo ni a malagiilyo, ang'wi kuhuuila iki nai mukigule? <sup>3</sup> Itii gwa unyenye inge miapungu ngele iyi? iti gwa unyenye inge miapungu ngele iyi? Iti gwa ai mandilye mu ng'wa ng'welu iti mumale

mumiili? <sup>4</sup> Iti gwa ai magile ku makani idu na nkanda, anga tai ai atulaa a nankanda? <sup>5</sup> Iti nuanso mupumyaa ung'wau n'wgelu kitalanyu nu kituma i ntendo ni angulu kati anyu witumaa ku ntendo ni a malagiilyo ang'wi ku kigiilya palung'wi nu uhuili? <sup>6</sup> Abrahamu; "Ai umuhuiie Itunda aka aligwa kina munya tai". <sup>7</sup> Ku ndogoelyo yiyo yiyoo lingi kina, awo naza ahuiie inge ana ang'wa Abrahamu. <sup>8</sup> Uukilisigwa ai ultile kina Itunda aza uze a aiilya tai ane antu a mahi ku nzila a uhuili, nkani ninza ai itanantigwe hanza kung'wa Abrahamu; "Ku ewe mahi ihi akukendetwa ". <sup>9</sup> Iti panyambele awo naza akete uhuili akembetwe palung'wi nu Abrahamu, naza watulaa nu uhuili. <sup>10</sup> Awo naza asumbiye intendo ni ya malagiilyo akoli pihi a uzung'wa, ku kina ikilisilwe, "Uzumilwe kila muntu niiza shanga uambinkanile ni makani ihi na kililigwe mu mbugulu ama lagiilyo kituma ihi". <sup>11</sup> Itungili inge ikihenga kina Itunda shanga ukumualya tai akwe ga nung'wi ku malagiilyo, ku nsoko, "Munya tai ane ukukie ku uhuili". <sup>12</sup> Ilagiilyo shanga lipumiie mu uhuili ku iti badala akwe, "Niiza witumaa imakani aya ku malagiilyo, ukukie ku malagiilyo". <sup>13</sup> Kristo ai ukugunile usese kupuma ku uzung'wa nui ilagiilyo itungo nai wizepilye kizug'wa akunsoko itu. Kunsoko ikilisigwe "Uzumilwe kila muntu nuikakong, wa migulya ikota". <sup>14</sup> Isigo ai lituile kina ukende naza watulaa kung'wa Ibrahimuaza uzee tula ku antu a mahi kung'wa Kristo Yesu, Iti kina kuhume kusingiilya u wigombya nua ng'wau ng'welu kukiila uhu-

ili. <sup>15</sup> Muluna, kutambula ku mpyani aki bi-naadamu, ga ni itungo naza wigombyaa nu wak-inadamu wakondile kuikwa ukomu kutile nuhumile kuleka uu ang'we kongeelya. <sup>16</sup> Itungili i malago ai aligitigwe kung'wa Ibrahimu nu ku ulelwa nu akwe. shanga ai iligitigwe anga "ku uutugi" kusigiilya idu, ila badala akwe ku ung'wi wing'wene, "ku utugi nu ako" ni iza inge Kristo. <sup>17</sup> Itungili kiligitya iti, ilagiilyo naza lizile myaka 430 panyambebe, Shanga lihejaa ilagiilyo ni la kunyuma nai liikilwe niItunda. <sup>18</sup> Ku nsoko anga ize uusali ai ize uzile ku nzila a malagiilyo, shnga ai uzee tula hangi uzile ku nzila a wigombya. Ku iti Itunda ai uupumilye nankanda kung'wa Ibrahimu ku nzila a wigombya. <sup>19</sup> Ku niki itungili ilagiilyo ai lipungwe? Ai longeeigwe kunsoko a milandu, kupikiila mulewa nu ang'wa Ibrahimu waze ku awo naza kitalao ai ai watulaa ulagiilwe. Ilagiilyo ai liikilwe kuukinyila kukiila u malaika ku mukono nua mulamuli. <sup>20</sup> Itungili u mulamuli usigiawe ku kilinkiila a muntu ung'wi, Ila Itunda inge ung'we wing'wene du. <sup>21</sup> Ku lulo iti gwa ilagiilyo likoli nsuta ni ilagiilyo ni la ng'wi Itunda? A! a! kunsoko anga ize ilagiilyo nai atulaa ipumugwe ai atulaa nu uhumi nu akuleta u upanga, tai ane ai iziigela ki ilagiilyo. <sup>22</sup> Ku iti badala akwe, Uukilisigwa ulugaie makani ihi pihi a milandu. Itunda ai uzepilye izi iti kina wigombya nu akwe nua kuuguna usese mu uhuili mung'wa Kristo Yesu uhume kigeeleka ku awo ni akuhuiila. <sup>23</sup> Ku iti ze ikili nu uhuili kung'wa Kristo kuza, ai katulaa katung'waa nu kutula pihi ilagiilyo kupikiila uze uukunukulwa

nu auhuiili. <sup>24</sup> Ku lulo ilagiilyo ai lizepigwe mutongeeli witu kupikiila Kristo nai akiza, iti kina kualigwe tai ane ku uhuiili. <sup>25</sup> Itungili kunsoko uhuilin wazilee kutili hangi pihi a mugozeeli. <sup>26</sup> Kunsoko unyenye mihi inge mi ana ang'wi Itunda kukiila uhuiili mung'wa Kristo Yesu. <sup>27</sup> Ihi naza mogigwe mu ng'wa Kristo, Mumutugae Krusto. <sup>28</sup> Kitili Muyahudi ang'wi mu Yunami, mutuung'wa ang'wi mulyuku, mugoha ang'wi musungu, kunsoko unyenye mihi inge ung'wi mung'wa Kristo Yesu. Anga ize unyenye inge mi ang'wa Kristo Yesu. <sup>29</sup> Uu inge uutugwa nuang'wa Ibrahimu, Asali ku ngulu ilaggo.

## 4

<sup>1</sup> Kuligitya kina kunsoko umusali inge ng'wana, mugila ikilo nu mutugwa, anga itule ga nu mukola hiu nua nsao yihi. <sup>2</sup> Badala akwe, ukoli pihi a mugozeeli nu mukuiili kupikiila itungo nai liikilwe n Tata nu akwe. <sup>3</sup> Ga ni iti ga nu sese, nai katulaa kiang'inya, ai kuambiiwe mu utung'wa nua malagiilyo na ng'wandyo na unkumbigulu. <sup>4</sup> Kuiti itungo ni lizipie nai lipikile, Itunda ai umutumile ung'wana akwe, mutugwa nu a musungu, mutugwa pihi ilagiilyo. <sup>5</sup> Ai witumile izi iti kuaguna awo nai akoli pihi ilagiilyo, iti kina kusingiilya i hali akutula anga ana. <sup>6</sup> Kunsoko unyenye inge mi ana, Itunda ai umulagiiye ung'wau ng'welu nua ng'wana nu akwe mukati a nkolo yitu. Ng'wau ng'welu nuitangaa, "Abba, Baba". <sup>7</sup> Kunsoko iyiy uewe shanga wi mutugwa hangi ila ng'wana. Anga ize inge ng'wana, uu gwa uewe inge wi musali



kkiila Itunda. <sup>8</sup> Ze ikili ga, itungo shanga ai mumulingile Itunda, ai mutuile mi atungwa ku awo niiza ku upuumoo shanga alungu nangaluu. <sup>9</sup> Ku iti ingili kina mumulingile Itunda, ang'wi kina mulingikile ni Itunda, kuniki mukusuka hangi mumalaagiilyo ni manementaalu ni ng'wandyo ni magila anga kinya uwai? Iti muloilwe kutula atung'wa hangi? <sup>10</sup> Muambile ku ukendegeeli lihiku ni menso lukulu, upumili nua mieli, matungo, ni miaka. Nikenda itumba kunsoko anyu. <sup>11</sup> Nikenda itumba kina ku kinya kituunga ni agilye nankanda. <sup>12</sup> Kumupepeelya, aluna, mutule anga ni nili, kunsoko ga natuilee anga ni mili. Shanga ai muntumuie. <sup>13</sup> Ila mulingile kina, ai itulikile inge kunsoko a ulwae nua muili kina ai ntanantilye nkani ninza kitalanyu ku nkua a ng'wandyo. <sup>14</sup> Ga ni iti i hali ane a muili ai imukile mu ugeng'wa, Shanga ai mumeile ng'wi kuni hita. Badala akwe ai munsingiiye anga u malaika nunang'wi Itunda, anga ai matulaa Kristo Yesu mukola. <sup>15</sup> Ku lulo, ukoli pii itungili uulowa nu anyu? Kunsoko kukiila kitalanyu kina, anga ihumikile, ai muzee komola imiho anyu nu kumpa unene. <sup>16</sup> Iti itungili, itii natulaa ni mulugu wanyu kunsoko kumuila itai? <sup>17</sup> Akuduma ku nsula, inge shanga ku ukende, aloilwe kumutemanula unyenye nu nene iti muatyate. <sup>18</sup> Inge iziza ikali kutula ni nsula kunsoko ni yili nziza, hangi shanga udu matungo ni nize nkoli palung'wi nu nyenye. <sup>19</sup> Ana ane aniino, kulwala uwai kunsoko anyu hangi kupikiila Kristo wiumbe mukati anyu.

<sup>20</sup> Aza nzee lowa aza ize nkoli pang'wanso palung'wi nu nyenye itungili nu kupiula ululi nu lane. Kunsoko nkete witumbi migulya anyu. <sup>21</sup> Ntambuili unyenye naza mukete isula kutula pihi ilagiilyo, shanga migulye ilagiilyo nili ligitilye? <sup>22</sup> Kunsoko ikilisigwe kina Abrahamu ai ukete ana akigoha abiili, ung'wi ku musungu uyo nu mutugwaa nu muya nu musungu ni mulyuuku. <sup>23</sup> Ga ni iti, uyo nua mutugwa ai utugilwe ku muili udu, ila uyo nua musungu nu mulyuuku ku wigombya. <sup>24</sup> Makani aya ahumile kuganulwa kutumila mpyani, kunsoko asungu awa impyani ni malago abiili, Ung'wi ao kupuma kulugulu nula Sinai. Witugaa ana ni atugwa. Uyu inge Hajiri. <sup>25</sup> Itungili u Hajiri inge lugulu nu la Sinai ukoli ku Arabuni. Wimpuanigwa ni Yerusalemu ni itungili, kunsoko inge mutugwa palung'wi ni ana akwe. <sup>26</sup> Ila Yerusalemu niiza ikoli migulya inge ndyuuku, hangi iyi yiyo nyinya nu itu. <sup>27</sup> Kunsoko ikilisigwe, "Lowa uewe musungu nuili wimugumba, uewe ni shanga witugaa. Nyansula ululi hangi ukue iyogo ku ulowa uewe niiza wimugila u wizeeli nua kutuga kundogoelyo idu inge ana ang'wa nu aileemugumba, kukulinkiila ni awo ni ang'wa uyo niiza ukete mugoha". <sup>28</sup> Itungili aluna, anga u Isaka, unyenye inge ana a wigombya. <sup>29</sup> Ku itungo nilanso naza u muntu naiza ai atugilwe ku ngulu nia muili ai umagilye uyo nai utugilwe ku ngulu nia ng'wau ng'welu, ku itungili inge lulo luuloo. <sup>30</sup> Ukilisigwa wiligitya uli, "Muheje umusungu mutugwa palung'wi nu ng'wana

nu akwe nua kigoha, kunsoko ung'wana nu a musungu nu mutugwa shanga ukusala palung'wi nu ng'wana nua musungu nu mulyuuku". <sup>31</sup> Ku lulo, aluna, Usese shanga ana nua musungu nu mutugwa, ila inge nua musungu nu mulyuuku.

## 5

<sup>1</sup> Inge kunsoko u Kristo ai ukinkiiye u lyuuku iti kutule ki alyuuku, Uugwa, imiki ikomu muleke kuambigwa hangi mu mumumpeto nua utugwa. <sup>2</sup> Goza, unene Paulo, kumuila kina anga itule mikatalwa kiganda, u Kristo shanga uku-muaiilya ku nzila ihi nanso. <sup>3</sup> Hangi, kumukuiila kila mugoha nu endile kiganda kina utakiwe kipumya nangulu ku malagiilyo ihi. <sup>4</sup> Mabaguwe kuli nu Kristo, awo ihi, "Numukualigwa tai ane" ku malagiilyo. Mugwie kuli nu ukende. <sup>5</sup> Ndogoelyo, ku nzila a ng'wau ng'welu, ku uhuiili kulindiie u ugimya nua tai ane. <sup>6</sup> Mu ng'wa Kristo Yesu katalwa kiganda ang'wi kuhita katalwa kiganda kutili ndogoelyo ihi. <sup>7</sup> Inge uhuiili wing'wene nuitumaa umulimo kukiila ulowa uugwa wisiigiila kintu. <sup>8</sup> Ai matulaa mi mankaa ntambo iziza. Nyenyu akamugilya kumikulya itai? U upeng'wi nua kituma nianso shanga upumile kitalakwe ng'wensu nui mitanga u nyenye. <sup>9</sup> Igai ishenyuu igazanja ipuli lihi. <sup>10</sup> Nkete usumbiilya nu nyenye ku Mukulu kina shanga mukusiga ku nzila ingiiza ihi. Wihi nuanso nuikamulimilya ukukenka uulamulwa nu akwe ng'wensu mukola, Wihi nuanso. <sup>11</sup> Aluna, anga ize nongolekile kutanantya ikidamu, ku niki nkili kagigwa? ku

ikolyo ili, iko niiza inge ikito nila ikota ni la mpaga kihumile kubepigwa. <sup>12</sup> Inge ulowa nu ane kutula awo ni akumutongeeela ibii aki hoola i kola. <sup>13</sup> Itunda umitangile, aluna, mu ulyuuku, iti muleke kuutumila u ulyuuku nu anyu anga lyoma ku muili, Badala akwe ku ulowa muzii aiilya unyenye ku nyenye. <sup>14</sup> Kunsoko ilagiilyo lihi likondaniie ku ilago ling'wi; ni nyenso inge, "Inge kusinja umulowe umunyakisali nu ako anga uewe mukola". <sup>15</sup> Kuiti anga muze itakuna nu kilya, igozeeli kina muleke kibipya unyenye ku nyenye. <sup>16</sup> Kukligitya, gendi ku nkolo, ni ang'wi shanga mukuikondaniilya insula nia muili. <sup>17</sup> Kunsoko u muili ukete nsula nkulu kung'wa ng'wau ung'welu, nu ng'wau ng'welu ukete nsula nkulu kikilya nu muili. Izi yuki kunyuma kila ing'wi nu muya, mapumilo i nge kina shanga mukituma iintu ni mukete insula ku ituma. <sup>18</sup> Ku iti anga u ng'wau ng'welu umutongee unyenye, mikutili pihi ilagiilyo. <sup>19</sup> Itungili intendo nia muili yigeelekile. Ni yenso inge, usambo, ushapu, wii. <sup>20</sup> Ipolya ni la adudu, ulogi, ulugu, wilea, nsula, kuhung'wa iko, wikingumi, utemanuki, nua matekeelo, <sup>21</sup> Wilu ulaku ugala ntuli ni makani mauya anga aya. Nu mu huguuye unyenye, anga nai nu muhuguuye un'wandyo, kin awo ni akituma imakani anga nanso shanga akusala uutemi ua ang'wi Itunda. <sup>22</sup> Ku iti inkali ang'wau ng'welu inge ulowa, ulyuuku, ugimya, uza nua nkolo, untu nu uziza, uhuili. <sup>23</sup> Upolo, hangi ngele; kutili anga ilagiilyo kikilya ni makani anga ayo. <sup>24</sup> Awo ni ang'wa Kristo Yesu au wagilye umuili palung'wi nu

umila mati ni nsula ni ao ni mbii. <sup>25</sup> Anga ize kuikie kung'wau ng'welu hangi kugende ku ng'wau ng'welu. <sup>26</sup> Kuleke kutula kia kidaya, kuleke kidumiilya kila ung'wi ku miakwe, Ang'wi kuleke ki onela u wilu.

## 6

<sup>1</sup> Aluna anga itule u muntu uambilwe mu ubii, unyenye ni mia ng'wau ng'welu, mulagi-igwe kumususha u muluna nuanso ku nkolo a ulyuuku. Munu muze mukendegee akola muleke kugeg'wa. <sup>2</sup> Mikenkelye i miligo, nu kululo muku likondaniilya ilagiilyo ni lang'wa Kristo. <sup>3</sup> Anga itule u muntu wihi ukihenga ingi wi bahu kunu shanga kintu, ukikongela u mukola. <sup>4</sup> Kila ung'wi naugemeelye u mulimo nu akwe, Uugwa ukutula ni kintu mukola wing'wene ni ka kikulya, shanga kiniganiilya u mukola nu muntu wihi. <sup>5</sup> Ndogoelyo kila u muntu ukuhola u miligo nuakwe mukola. <sup>6</sup> Muntu nai umanyisigwe u lukani kulinja amuhanguile i maziza ihi u ng'walimu nu akwe. <sup>7</sup> Leki kukongelwi; Itunda shanga we senswaa, kila nuku kitemela u muntu kiko ukukiogola ga. <sup>8</sup> Kila nui temelaa imbeu mu upumuumo nuakwe nua milandu, wikagola u ubepigwa ku iti nuanso nuitemela imbeu ku ng'wau ng'welu, wikaogola upanga nua kali na kali kupuma kung'wa ng'wau ng'welu. <sup>9</sup> Kuleke kukatala kituma imaza, ndogoelyo ku matungo akwe kuuogola anga itule shanga kuuhung'wa u ukata. <sup>10</sup> Iti gwa, matungo ni kikatula ni lyoma, kitume ni maziza ku kila ung'wi. Kitume ni maziza ku kilinkiila lukulu ku niamoli mukati

a uhuili. <sup>11</sup> Gozeeli u ukulu mumabada nakil-isilwe ku mukono nu ane mukola. <sup>12</sup> Awo ni aloilwe kituma uziza ku isigo ni la muili wawo anya kusingigwa atalwe kiganda. akituma iti kunsoko aleke kingila mu lyago nu likota ni la mpaga ni lang'wa Kristo. <sup>13</sup> Ndogoelye ga nao ni atawe ki ganda akola shanga aambile ilagiilyo. Badala akwe aloilwe unyenye mutalwe kiganda iti ahume kilolya ku miili anyu. <sup>14</sup> Ileke kupumiila nilolye kwala kikota ni la mpaga ni la Mukulu nu itu uYesu Kristo. Inge ku ng'wensu u unkumbigulu ai wagigwe ku ng'waane nu nene ku unkumbigulu. <sup>15</sup> Kunsoko shanga ikeewe katalwa ki ganda ang'wi kuhita katalwa kiganda kutula inge kintu. Badala akwe ulelwa nu upya inge wa ngulu. <sup>16</sup> Ku ihi anya kieke ku ilagiilyo ili, atule nu ulyuuku nu ukende utule migulya ao ihi, ni mugulya a Israeliang'wa Itunda. <sup>17</sup> Puma itungili muntu wihi waleke kunyoma, ndogoelyo nkenkile logo nulang'wa Yesu mu muili nu ane. <sup>18</sup> Ukende nua Mukulu witu Yesu Kristo utule ni nkolo ni anyu, Aluna. Amina.

## **Isanzu Bible**

### **The New Testament in the Isanzu language of Tanzania**

copyright © 2020 Door 43 International Mission Community

Language: Kiisanzu (Isanzu)

Translation by: Door 43 International Mission Community

Contributor: Bundala Isanzu, MCH Bundala, Mlilo Isanzu, Rev. Bundala Samwel

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2020-07-31

---

PDF generated using Haiola and XeLaTeX on 21 Feb 2024 from source files dated 31 Aug 2023

b95c8559-38aa-5982-90b8-16a1be58209c